

Usa sa pinaka-gidumilian ug gikadumtan nga pagtulon-an sa Bibliya mao ang pagtulon-an sa pagpanalikway kon doctrine of Reprobation sa eninglis, apan dili angayan nato nga dumilian kining maong kamatuoran tungod ug alang lamang sa atong mga kinaugalingon nga mga rason. Gikinahanglan sa usa ka tinuod nga magwawali sa Dios nga itudlo ang tibuok nga kamatuoran sa Dios luyo sa daghanan nga pagsupak tungod kay mao nay katungdanan sa tinuod nga tinawag sa Dios nga mga Iyang matinumang piniyalan.

Mao nga dinhi atong tun-an ug hatagan ug pagtagad kining kamatuoran sa doktrina sa Pagpanalikway nga nakapatik sa Balaan nga Kasulatan.

I- Ang Termino nga Pagpanalikway

Ang termino nga pagpanalikway nag-ugat kana sa pulong sinalikway.

- Sinalikway sama kana ug ipasabut sa gipasagdan, gitalikdan, gibiyaan.
- Sa Webster New Dictionary pahina 319 Nagkanayun –sinalikway sa Dios
- Sa Scribner Bantam English Dictionary pahina 769, nagkanayun- gitugyan ngadto sa kasal-anan.
- Hebreohanon “mâac” ug sa Grego “adokimos” nga nangahulugan ug sinalikway, gipasagdan.

II- Ang Pagpanalikway usa ka Biblikanhon nga Pagtulon-an

- a. Giisip ingon nga sinalikway nga salapi (Jeremias 6:28-30)
- b. Mga napakyas sa pagpangalagad [napakyas sa binisaya - reprobate sa eninglis] (2 Corinto 13:5)
- c. Mga dunot ug hunahuna ug sinalikway sa pagtoo (2 Timoteo 3:8)
- Ang usa usab sa dayag nga paghulagway sa pagpanalikway atong makita sa **Roma 9:19-23** nga diin ang sinalikway gihulagway ug **sudlanan nga gikapungtan aron pagalaglagon**

III- Ang Pagpanalikway nahitabo kini didto pa daan sa Eternidad

Roma 9:11- Bisan sa wala pa mahimugso ang mga bata ni makabuhat ug maayo o dautan.
Salmo 58:3- Ang dautan gilain gikan pa sa tago-angkan.

Proverbio 16:4- gibuhat sa Dios ang tanang butang alang sa Iyang kaugalingon, bisan ang dautan alang sa adlaw nga dautan.

Judas 4- adunay mga tao nga gipasulod sa hilom nga daan nang gikatagana alang sa kalaglagan, mga taong dili diosnon nga nanagpadapat sa hiniwi sa grasya sa Dios.

Pinadayag 13:8 ug 17:8 – mga ngalan sa tao nga wala mahasulat sa basahon sa kinabuhi nga iya sa gipatay nga Cordero, gikan pa sa wala matukod ang kalibutan.

IV- Ang plano sa Dios sa Iyang Pagpamili ngadto sa kaluwasan ug pagpanalikway ngadto sa kalaglagan.

- ❖ Ang pagpamili sa Dios ngadto sa Kaluwasan alang kana sa Iyang himaya aron mapadayag ang Iyang Gugma ug kaluoy.
Isaias 43:7 ikompara sa Roma 9:16,23 ; Efeso 2:4-5; 1Timoteo 1:12-17.
 Ang pagpanalikway sa Dios ngadto sa kalaglagan aron kana ikapadayag ang Iyang kagahum pinaagi sa pagpakita sa Iyang balaanong Hustisya.
Roma 9:17-22 ikompara sa Roma 2:5,16; Pinadayag 20:15.
- ❖ Ang pagpili sa Dios ngadto sa Kaluwasan alang kana sa mga tao nga gitagana aron makapanunod sa Iyang gingharian sa wala pa ang pagkatukod sa kalibutan (**Mateo 25:33-34**).
 Ang pagpanalikway sa Dios ngadto sa kalaglagan alang kana sa mga tao nga gitagana sa Dios sa Iyang kapungot (**1Tesalonica 5:9**) tungod kay daan nang giandam sa Dios usab ang linaw nga nagdilaab nga kalayo sa Impierno alang sa mga sinalikway (**Isaias 30:33; Mateo 25:41; Roma 9:21-22**).

V- Ang katuyoan sa Dios ngadto sa mga pinili ug sa mga sinalikway.

- a. Katuyoan sa Dios Amahan nga aduna Siyay gipili aron mangaluwas sa wala pa matukod ang kalibutan, ug katuyoan usab sa Dios Amahan nga aduna Siyay wala mapili o sinalikway sa wala pa matukod ang kalibutan. (**1 Pedro 1:2; Efeso 1:4; 2Tesalonica 2:13; Juan 15:19; Roma 9:11 ikompara Judas 4; Pinadayag 13:8; 17:8**)

- b. Katuyoan sa Dios Amahan nga adunay mga tao nga Iyang gikahatag ngadto sa Iyang Anak aron maoy luwason pinaagi sa kamatayon sa krus (**Juan 6:37-39 ikompara Pinadayag 5:9, Juan 10:11; 17:2,5**). Ug aduna usab gilabyan gikan pa sa eternidad nga wala gikahatag sa Iyang bugtong Anak aron lukaton, klaro kana diha sa pag-ampo ni Jesu Cristo (**Juan 17:9-12, 24**).
- c. Katuyoan usab sa Dios Amahan nga ang gikatagana ngadto sa kinabuhing dayon motoo gayud sa dihang tawagon pinaagi sa pagwali sa Maayong Balita (**Buhat 13:48 ikompara sa 2Tesalonica 2:13-14; Colosas 1:17; 2Timoteo 1:9**) samantala ang uban gipasagdaan ug gitugyan diha sa ilang pagkamakasasala nga kahimtang (**Salmo 81:12; 119:119; Buhat14:16; Roma 1:24**)ug sa pagpabilin nga buta diha kamatuoran (**2Corinto 4:4; Roma 11:7-8; Juan 8:47**).
- d. Katuyoan sa Dios Amahan sa pagtipig sa Iyang katawhan aron dili malaglag (**Jeremias 32:4; Salmo 37:23-24; Filipos 2:13; 1Corinto 11:32; Hebreohanon 12:5-8**) ug sa pagbantay sa mga sinalikway nga pabiling ubos sa pagkahinukman ingon nga nalimbongan (**2 Tesalonica 2:11-12; 2Pedro 2:9; Isaias 42:16-17; Pinadayag 17:17**).

VI- Ang Pagpanalikway dili pagpamili ngadto sa pagkalaglag

- Ang Dios igo lamang nagpili ug mga tao nga Iyang pagakaluy-an ug grasyahan aron kini mamaluwas(**2 Timoteo 1:9 ikompara Efeso 1:4-5; 2:5 ; 2 Tesalonica 2:13; Titus 3:5**), apan nganha sa pagpanalikway ang Dios wala magpili ug mga tao aron pagalaglagon apan gilabyan lamang sa Dios ang mga wala mapili ngadto sa kaluwasan ato kanang madayag sa pagpamulong sa atong Ginoong Jesu-Cristo sa **JUAN 15:19** nga nagkanayun:“ **Kong kamo iya pa sa kalibutan, ang kalibutan mahigugma sa mga iya; apan kay gipili ko man kamo GIKAN sa kalibutan,** mao nga ang kalibutan nagadumot kaninyo”.Nianang maong bersikulo atong makita nga ang mga pinili sa Dios gipili gikan sa kalibutan, nan nagpasabut

kana nga ang mga pinili sa Dios natawo niining kalibutana nga mga makasasala ingon nga sa kinaiyahan nga taong gikaligutgotan sa Dios sama sa ubang mga tao (**Efeso 2:3**) ug ang Dios nagpadayag sa Iyang Kaluoy bisan sa wala pa ang pagkatukod sa kalibutan (**Efeso 2:2-5, 10; 1Pedro 2:9-10**). Kay kung wala pay pinili ang Dios wala gayuy tao nga mamaluwas (**Roma 9:29**) tungod kay ang tanang mga tao nakasala ug makasasala man (**Ecclesiates 7:20; Roma 3:10-12, 23**) ug ang bayad sa sala mao ang kamatayon (**Roma 6:23; Pinadayag 21:8**). Busa ang Dios nagakaluoy sa Iyang pagahatagan sa kaluoy ug nagapatig-a kang bisan kinsa nga Iyang patig-ahon (**Roma 9:18**).

VII- Ang pagpanalikway sa Dios maoy pagpanagana nga daan alang:

1. Sa pagkapandol sa pulong Dios (1Pedro 2:8)
2. Sa pagkahinukman sa silot (Judas 4)
3. Sa kangitngitan (Judas 13)
4. Sa pagkahinukman (Habakuk 1:12; ikompara Juan 3:18)
5. Sa pagpabilin nga ubos sa silot hangtud sa adlaw sa paghukom (2Pedro 2:9)
6. Sa adlaw sa kapungot (1 Tesselonica 5:9)
7. Sa adlaw sa kadautan (Proberbio 16: 4)
8. Sa adlaw sa kaguol-anan ug kaligutgut (Job 21:29)

VIII- Ang mga Biblikanhon tawag sa mga sinalikway

- Kaliwat sa mga mamumuhad ug dautan (Isaias 1:4)
- Kaliwat sa kabakakan (Isaias 57:5)
- Masukihon nga mga kaliwatan (Isaias 30:1)
- Sinalikway nga salapi (Jeremias 6:26-30)
- Kalibutan (Juan 15:19; 17:9,14; 1Juan 2:15-16)
- Sudlanan nga gikapungtan (Roma 9:21-22)
- Mga tawong masupilon (Efeso 2:2; 5:6; Colosas 3:6)
- Bunglasyon (Mateo 13:38-40)
- Baboy ug iro (Mateo 7:6; 2 Pedro 2:22)
- Kanding (Mateo 25: 32,41)
- Tinunglo nga mga kaliwatan (2Pedro 2:14)
- Mga anak sa Yawa (Juan 8:44)

IX- Mga timailhan sa pagkasinalikway

- a. Dili maghinulsol (Roma 2:5)-> ang matuod nga paghinulsol hatag kana sa Dios nga musangko sa kinabuhi (Buhat 11:18) ug lahi kana sa kalibutanon nga paghinulsol nga diin musangko sa kamatayon (2 Corinto 7:10) tungod kay naglunang man lang gihapon sa kasal-anan ug walay kausaban (Proverbio 28:13 ikompara 2 Corinto 5:17)
- b. Dili motoo kang JesuCristo isip bugtong nga manluluwas ug makaluwas apan dunay pay daghang gitoohan nga makaluwas sama sa binuhatan, bautismo, kasugoan, pagpamembro sa Iglesia, nga samantala ang pagtoo nga hatag sa Dios nganha man lang ipatumong kang Cristo ug wala nay lain pa (Hebrohanon 12:2; Efeso 2:8-9 ikompara Juan 3:18, 36; 5:24; Buhat 4:10-12; Roma 5: 8-9; Hebrohanon 9:22 & 28)
- c. Pabilin nga nalimbongan (1Corinto 6:9-10; Juan 10:26; Galacia 6:7; 2 Tsalonica 2:11-12)
- d. Pabilin nga buta ug dili makabati sa mga pulong sa Dios (Mateo 13:13, Juan 8:47).

Konklusyon:

Karon higala kung ikaw wala pa nakasiguro sa imong kaluwasan ang Bibliya nagasulti "**tutok kang Jesus nga mao ang mag-uugmad ug maghihingpit sa atong pagtoo**" (**Hebrohanon 12:2**), Siya mianhi sa pagtawag sa mga makasasala aron sa paghinulsol (**Mateo 9:13**), dungag pa si Jesus miingon "**siya nga moari kanako dili ko gayud igasalikway**" (**Juan 6:37**). Busa higala sumala sa Maayong Balita, hinulsoli ang imong mga sala ug toohi nga si Jesu-Cristo nag-antus, namatay ug nabanhaw alang sa imong mga sala aron ka maluwas (**Mateo 1:21; Marcos 1:15; 1Corinto 15:1-3**). Ang imong tinud-anay nga paghinulsol ug pagtoo pamatuod kana nga ang Dios mitrabaho sa sulod nimo..

Kung adunay kay mga pangutana o buot ka ba nga bisitahan sa inyong panimalay etext ning Numero 09556144793

Bisita ka sa mga Berea, Landmark, Sovereign Grace Baptist Churches sa inyong haduol nga dapit.

Pastor/worker: _____

Address: _____



Basaha ug ton-i uban sa
imong Bibliya

JUNREY J. MONCADA
BEREA BAPTIST CHURCH
SABANG, CABURAN BIG
JOSE ABAD SANTOS, DAVAO OCCIDENTAL

